



HEY, DIA 4 OKTOBER TA DIA MUNDIAL DI BESTIA!

“World Animal Day” ta wordo celebra tur parti di mundo. Ta un mision di mundo henter pa celebra bida di animalnan den tur forma, pa celebra nos relacion cu e reino di animalnan, pa reconece y aprecia e diferente rolnan cu animalnan tin den nos bida: manera esun di un bon compaño, sosten y ayudo, y tambe pa reconece y duna danki pa e manera cu animalnan ta enrikece nos planeta y nos bida.

Tur rond di mundo organisacionnan ta duna sosten na otro riba e tereno di cuidu, bienestar y derecho di animalnan. Akinan na Aruba tambe nos tin diferente organisacionnan, gruponan, shelternan, personanan individual y voluntarionan cu traha na e bienestar di nos animalnan.

Dia Mundial di Bestia a bira un dia cu mundialmente ta recorda y duna tributo/honor na tur bestianan y personanan cu ta stima y respeta animalnan.

Tur dia di aña animalnan ta hasi un impacto positivo ariba e bida di miles di personanan rond di mundo. Laga nos yuda na educa nos muchanan, yuda proteha y hasi lo maximo pa conscientisa riba e bienestar, cuidu y proteccion di nos animalnan na Aruba y rond di henter mundo.

E aña aki atrobe organisacionnan mundialmente ta pidi tur e organisacionnan cu ta traha pa of cu animalnan pa enfoca riba conscientisacion y educacion. Conscientisacion lo yuda pa drecha e calidad y standard di bida pa animalnan rond di mundo. Y, educacion por yuda crea un cultura di respet, cariño y aprecio pa tur locual cu tin bida riba e planeta aki.

Animal Rights Aruba ta suplica pueblo di Aruba pa ta mas consciente y pa sea un ciudadano responsabel. Ban para hunto contra maltrato y abuso di bestia. No laga awe so ta dia di bestia sino **TUR DIA MESTER TA DIA DI BESTIA!!** Cuida bo animal domestico, dune un bon calidad di bida door di: dune cuidu di un veterinario, dune amor, awa y cuminda tur dia, un shelter pa e por sconde di solo y awacero, sterilise of castre. Sea un doño responsabel y tambe ban trata flora y fauna di Aruba en general cu su debido respet. Laga nos celebra tur dia e relacion y bida di nos como ser humano y animalnan riba nos dushi tera. Hunto nos ta forma e circulo di bida. Mescos cu nos, animalnan tambe tin derecho di existencia y nan tambe merece un bon bida. **Laga esey ta bo compromiso cu nos bestianan riba nos isla!**

Por ultimo si bo ta un persona cu ta stima bestia, sea parti di un proyecto special. Nos ta conseha pa sondea con abo por yuda un animal y hasi algo special pe y den su bida!

Boardmembers y voluntarionan di Animal Rights Aruba ta desea cu hunto nos por yega na un Aruba mihor pa nos tur incluso nos bestianan.

Aruba, 4 oktober 2013